

劉

孟

塗

集

諸家評語

陳笠鵬方伯

孟塗之詩取六朝三唐共爐而冶其天才縱逸性情樸厚足以副之一時儕輩罕出其右者歲月方富昔人所謂一日千里者又安能量其所至乎

鮑覺生宮詹

孟塗先生吾皖奇士也於書無所不讀總角便解吟咏所爲詩不名一家大率逸氣凌雲清姿濯雪蒼雄古艷肩六代而跨三唐至于古文之出入韓蘇經說之攀提孔鄭皆近時承學之士所不逮乃其年尙未四七也豈非奇才絕出獨步江東者耶漫志數言不足以揄揚萬一也

吳山尊學士

舉頭天外御風而行驅使萬卷泉達火然吾不知其去太白若何當吾世則仲澤死矣誰能與戰

無一險韻寡句自然奇卓斯爲仙才

昨臘風雪中快讀大集正如春風入林草石皆有生氣涼秋索居復示四卷高奇出世之才淹深入古之學不爲前代作者門戶所限力追魏製晉造亦能略貌取神擺脫窠臼正思錄副度之行笈爲他日風雨晤對以起吾衰藥吾枵窗外落葉大作君且報罷携之去矣大慟書此

師荔扉明府

承題紀游圖八首措一詞雲垂海立轉一韻石破天驚於題中題旨之意層層俱到面面皆靈八圖得此可以不朽矣近時唯飲前在張船山差可驟乘餘子俱難爲後

張鶴舫進士

風騷以還五言如甄后蒲生篇繁欽定情篇十九首客從遠方  
來二首七言如張衡之四愁魏文之燕歌行皆得永言之遺孟  
塗此卷復古而獨造謂之倣與創皆可要其於溫柔敦厚長言  
咏嘆之旨十不失七八矣並時抗手者誰乎宜其自命廣陵散  
也

鄭夢白明府

孟塗詩力追古人又不肯一字留古人面目當其下筆時剖天  
心鑿地窟覃精極思造化在我故能鑪鑄萬物橐籥陰陽神力  
所到變幻不測嗟乎君方弱冠造境若斯由今以往君將何地  
着古人也吁可畏哉可畏哉

五言小詩含情瀝思古樂府遺音七言截句神韻獨絕却從太

白龍標得來

陳沅齋明府

壬申九月旣望讀于章江旅舍時從茂苑初歸挑燈竟夕愛弗能釋覺丁卯夏間所讀諸篇猶是元相少作此則雄深雅健直欲凌邁三唐當世諸賢誰與抗手

鄧菽原明府

拔地倚雲之才驅山駕海之氣鏘金戛玉之節細鍼密縷之思沉吟反覆始而震掉眩惑久之心曠神怡乃知非奇實正非肆實醇每羨方盛之年所得已臻此境此後才愈大見愈高又不知是何如境界矣

周澗東明經

孟塗史事極熟上下馳驟數千年如指諸掌暇出其詩若干卷

示余余讀之風飛潮湧千軍萬馬之雜遝而來也鉅險鑿幽鬼  
斧神斤之運奇無際也百里一小曲千里一大曲黃河一瀉而  
泥沙土石俱淨也蒼涼古直中饒有妖嬈生新之致脊然以深  
超然以遠蓋孟塗生逢

熙世少負不羈不可以詩人目之亦不可以學人目之獨往獨  
來自成一隊他時清廟明堂之作三光六合鑒其詞也靈臺辟  
雍之述騶虞耜首形諸咏也於以黼黻

太平之盛豈僅校書中秘顯名東觀也耶

劉孟塗傳

姚元之撰

孟塗姓劉氏名開字明東一字孟塗又字方來家桐城某鄉之孔城生數月而孤年十四以書謁惜抱先生先生大奇之因就事先生之門得其學其爲人落脫不羈喜交游與人言言輒盡肺腑言不少隱家貧不能養奔走四方間無干謁之態以故人爭重之四方賢士無不知有劉孟塗者嘗謂元之曰吾鄉多佳山水使吾得有菽水資迎吾母居龍眠杯渡間手一編日夕諷詠且不去吾母左右其樂當何如而顧爲是僕僕者哉然亦習舉子業試輒不利卒以上舍終年四十一豈天將豐其才而故嗇其遇耶抑旣永其名卽不與以壽耶初孟塗游於浙過某邑有人候於門卒然問曰君得非桐城劉先生耶要至其家具盛饌酒半告以有母孀且老守志數十年欲乞能文者爲壽前夕

之夜夢其父語之曰三日有桐城劉先生過吾門非先生文不能傳爾母也當固請之旣復與遊山至一古墓所有碑題曰宋處士劉開之墓因目孟塗爲處士後身而孟塗亦慄然自失知已將終不能貴以顯也道光元年亳州修邑乘聘孟塗乃以正月行別其妻曰此去尙相見耶妻愕詰之則亂以他辭及之毫寓佛寺嘗以詩寄同里張用禧伯棠有云故人不見青山遠拋盡江南是此行張君以爲不祥閏月十一日陡得腹疾委頓勢不起指佛殿金葫蘆頂示客曰視月色中乃吾去時也果以其時而逝嗟乎孟塗之辭家也若已知其不返其逝也又預知其期或謂孟塗生有所自來理或然與喪歸妻倪欲以身殉其姑止之不可守之倪夢孟塗遣兩鶴至迎其女女頓天倪死志益堅一日姑往竈下聞閤戶聲縊死矣鄉人頌倪一雙兒女未三



年之句無不壯倪之烈而悲孟塗之命蹇也然孟塗生享盛名  
文且爲鬼神所重沒又能得其婦之烈而更有所以傳於不朽  
者夫乃嘆天之生是人也非偶然而其所以待是人也又未嘗  
不極厚也孟塗詩有前集十卷已梓歲久板且損沒後前臺灣  
令家弟瑩急造其家訪遺藁得後集二十二卷缺第八卷文十  
卷駢體文二卷臨漳令家弟柬之懼其久而更佚也爲捐貲付  
剞劂併重刻其前集屬元之任其事鄱陽陳方海伯游偕伯棠  
助讐校焉噫孟塗生以惜抱先生得名死乃得吾兩弟成其名  
其生平與元僅一再見每辭出復返惓惓有不忍舍去之意豈  
於吾家有獨厚耶可異已丁亥閏月

劉孟塗傳

鄱陽陳方海撰

孟塗名開字明東一字孟塗桐城縣學生生二歲而孤母吳忍死自守奉養舅撫弱子饑寒之中廛而相活孟塗幼卽神雋異於常童長益好學文雅優備年十四上書鄉先輩姚公飛公奇賞之常謂人曰此子他日當以古文名家望溪海峯之墜緒賴以復振吾鄉之幸也孟塗旣游姚公之門名益著絕迹千里籠罩靡前方聞宿儒避席惟謹皖藩某公欲妻以女孟塗謝之其時孟塗貧愈甚旣無兄弟獨身養母傭書四方寒暑匪憚衾衣食絕嗜欲文采之外無他營焉人謂孟塗節母之子必當食報孟塗亦激叩自喜謂不宜以秀才終而孰知不然奔走垂三十年卒以客死死時年四十一母老矣子裁四歲所著續列女傳若干卷詩已刻者十卷未刻者若干卷文若干卷詩文外集若

干卷其他說經之書及雜著皆未成恐不錄

陳方海曰余交孟塗始末五年每年一再相見談讌極歡孟塗馳辯汪洋懸河在口旁推橫溢間涉偏宕余每與之爭不以爲迂也今孟塗竟死思聞狂言不可復得悲夫悲夫孟塗少時人亦非真愛其才徒謂有才如是光氣可畏年三四十不知位望若何矣故傾心結納以得識爲榮游履所向冠蓋雲委及久不得志而所往益窮甚或忌才之徒攘臂而起競排遠術請進末師可笑矣哉天於孟塗卽不欲其富貴第假以年所業豈有底止然卽今論定亦可不負觀其包孕經典發揮事理吐實含華抽心呈貌足令真宰失色古人退聽篋中積稿且過三尺厯觀前代壯年著述罕敵其多神太用則竭形太勞則敝短折有由不可不察夫玉在山而草木潤淵生珠而岸不枯乃人有文而

朽其軀何邪孟塗死於亳州慮其遺書散失無人持付其家以  
待其子之傳也使彼畢生勤苦歸於埃滅更何以爲天道乎嗚  
呼此非余之所能測矣

孟塗後集卷一

桐城劉

題小孤山

獨向波心立亭亭入杳冥一峯連漢白四面落江青石冷疑凝  
雪風高激怒霆仙人無處覓烟水暗前汀

中流懸斷壁直壓楚雲端海水不能到

江湖到小孤即止

天風吹更寒

層巒凌漢表飛翠滿江干落日潯陽岸何人帶晚看

古廟濤聲裏千春長碧蕪晴光臨水斷高影入雲孤空際成昏  
曉天南割楚吳不知江上句得似子瞻無

抵星渚贈鄭夢白明府

生平不學韓與歐筆鋒所向無千秋天風海月助談笑唾珠亂  
落驚王侯偶然足下起霞氣憑虛徑欲凌滄洲月黑浪高不能

渡浮舟乃作西江遊雲中覓酒買春色一醉直到星渚頭星渚  
大令神仙儔才名昔日傾皇州賈生對策抗高論氣排日月搖  
嵩邱曲江宴罷春如故種得河陽花萬樹與余邂逅滄江樓雄  
談立破九霄霧中堂日暖開華筵金盤銀海喧暮天飲我青霞  
食紫烟我心未醉骨已仙騰身高踞楚雲上匡君大呼不肯前  
急推五岳回百川吾徒會合非偶然文章有神天無力腐儒動  
乃稱前緣揮君七寶之金鞭東風搖蕩春欲顛吾將與之共迴  
旋勲名富貴等閑事難得相逢俱少年少年及時且行樂一日  
新知百年約但願翱翔天地間子爲鸞鳳我爲鶴潯陽九派出  
江關雙姑遙待翠微灣夜夜催歸我不還來朝同上匡廬頂踏  
破天光共雲影碧峯高處近瑤臺醉卧莫辭風露冷

紀夢

江風搖夢夢不醒此身已到琵琶亭廬山蒼蒼露微月一痕夜色浮空青覺來山與雲俱失而我猶不離故形起尋殘夢寒生櫺東方欲曉天冥冥雲烟變滅歸滄溟人生飄忽如流星未知夢裏去來路昨夜何人先我經

江州懷古

亂雲爭向暮天生有客潯陽買棹行九派巨川迷故迹六朝戰氣散濤聲元規望自符臺鼎溫嶠功猶著石城留得荒邱話成敗壯懷合爲古人傾

大江北望是荊州雄鎮當年各上流異代煙波徒送客一城風月趁登樓襟懷浩蕩誰天馬身世浮沉半野鷗尙喜王宏能好士陶公隱去竟從游

匡廬近在楚雲東映水千峯翠着空山氣未寒先作雨湖神何

力敢分風築隄刺史棠陰綠握節將軍頸血紅可惜多謀徐道  
覆托身恨不遇英雄

一曲琵琶調最傷青衫司馬淚成行謫官情自憐商婦故宅人  
誰問草堂好句名山留副本荒亭春水弔斜陽登樓我亦勤題  
咏詩卷東林未肯藏

星渚署中觀王陽明先生平濠紀功碑刻題後

機星南指過雷池四郡兵摧百萬師先勢已令強敵怯成功翻  
致捷書遲安危羣小臨戎日疑信孤臣被謗時湖水昔曾流戰  
血山城今始認豐碑

偕馬庶常游廬山宿白鹿洞

昔賢事高隱寄跡北山邱白鹿隨人去清泉向我流斷雲迷片  
石古木各千秋坐聽松聲起驚濤夜入樓



偶爾談經處名聞霄漢間此心猶皎日吾道在青山門外草長  
滿洞中雲自閒我來掃殘碣尙見舊苔斑

### 東明山

結屋東明下山深忘歲年一家自昏曉四季總雲煙水暗疑無  
路林開別有天至今巖上月猶照墓門邊

### 天神閣

連空起飛閣四面倚東風彷彿聞神語微茫托畫工去來形影  
外指視有無中從此徵天意何須問絳宮

### 義門橋

千古靈泉路垂楊花滿溪橋分人影出石共岸雲齊浮柱當風  
立飛虹落水低舊題何處覓門對夕陽西

### 題杜虛齋傷逝詩後

杜宇無端叫暮陰江樓極目已春深人因別久難尋夢詩到愁  
多不敢吟烏亂可聞今夜語月明曾照舊時心瑤池拋卻雲和  
瑟寂寞天邊少鳳音

楚水茫茫接遠汀欲將哀怨寄湘靈廿年心跡雲同冷二月春  
愁草又青修竹暮寒思獨倚落梅新曲好誰聽分明樓閣東風  
路消息無由問繡屏

夜月無聲下碧池高臺空報紫簫吹半生賦命真窮薄千古傷  
心是別離青鳥飛翔應有路春蠶零落不成絲空山長卧無昏  
曉泣斷寒雲只自知

燕閣春風幾度過離居天末意如何夢中不識重逢樂覺後真  
嫌一見多痛惜芳魂縈蔓草可能幽思托微波三年腸斷瑤姬  
石寒露荒烟長碧蘿

寄家書偶懷

回首征車出故林，浮雲滿地起層陰。  
臨行已覺無他語，別去偏多不盡心。  
人事半從春後改，江波流過漢陽深。  
東歸久報芳洲隔，更聽孤鴻月下音。

贈方茶山太守兼以留別

歸雁叫春春去早，我向匡山別五老。  
玉女挽之不肯留，隨風直下雲中道。  
心如渴驥奔平川，河海在前忽驚倒。  
先生飲以萬頃波，我浸其中忘醉飽。  
高樓正對康山開，金仙有尺量羣才。  
時校士饒

州立破雲根作瓊屑，坐揚衆響成風雷。  
興來天半偶揮手，猛虎連羣渡江走。  
楚吳風色爭來前，簾外白雲催進酒。  
當筵意氣橫蒼穹，轉海移山一笑中。  
高談四座破顏色，咳唾欲落生天風。  
夜闌更話天人策，上下千秋一浮白。  
我與先生誰主客，放懷直可

容滄洲豈厭狂生醉落魄風前出示雲錦章百靈隱約爲飛翔  
山翠忽從卷中出我身疑到雲屏旁吁嗟乎文章聲氣通霄壤  
千里聞名結遙想況當北海生同鄉攝衣願共凌蒼莽古來奇  
士空羣儔求道先隨鸞鳳游李白早遇漢東守寧知世有韓荆  
州與公同聽西牕雨噓氣成煙向風舞百年身世九霄心對此  
茫茫自終古飛塏崔嵬凌碧天歸心已寄滄江邊待公挽住東  
流水看我明湖泛釣船

題徐梅圃石溪送行圖

當時堤畔柳初齊送客扁舟過石溪風笛數聲天正晚白雲回  
首又東西

秦中山氣逐人開此去身從鳥道回天半芙蓉高不落河聲獨  
向馬前來

雲樹迢迢日正明  
王孫游倦草還生  
如今不向長安道  
猶記東風送別情

千尋山色留行迹  
一片溪流照別顏  
誰識圖中舊年少  
白頭江上憶秦關

別鄭夢白明府

此心欲挂天邊月  
照子玉顏不離別  
東風見促無奈何  
又向江頭作歸客  
江頭久客苦思歸  
纔到歸期心轉悲  
故人酒厚不能飲  
欲發未發徒歔歔  
山氣曉寒疑作雨  
楊花片片隨風舞  
岸上羣鶯止不啼  
笑余此去相思苦  
君今胡爲立江渚  
碧草含煙淡如許  
離情欲共煙波語  
亦知後會自有時  
此時難別瓊樹枝  
側身更望霄漢迥  
廬山東南君管領  
我今歸去無他求  
願借峯頭雲萬頃

白鹿洞留別元伯

故人愛芳草游子惜斜暉共此春江路扁舟我獨歸幽懷對樽  
酒行色上征衣昨夜經過處流雲不肯飛  
君作青山主余尋碧澗春可堪送行日同是憶歸人故國書遲  
發征途意轉親天涯各努力雲路在前津

雷音塔歌

望江大令師荔扉先生建塔於迴龍宮名曰雷音取大雷  
池之義以望江名宿詩文稿藏於塔中屬余爲詩

赤鳳淒涼碧雞死文章同哭秋風裏篋中縱有碎珊瑚剝落千  
秋付煙水先生月斧揮雷陽沉響盡逐春風揚痛惜文園草遺  
落藏之石室登高岡一塔收盡千琳瑯下臨山色何蒼蒼龍宮  
並出遙相當雲根七級戰風雨中有前賢心獨苦精光不使山

鬼窺吟魂應共塤鈴語塤今何幸留人才四面青琅閉不開斷  
文故紙有時毀終不飛作塵與灰我聞吳楚浮圖百千尺充以  
舍利耀金壁何如此塤藏風雲墨迹斑斑氣長碧六丁不取鼇  
難傾石補地氣通元精公聽子夜神飈起空中定作金石聲

贈江七峯

君作飛仙引聲聲天半聞貽人三秀草染指九華雲余亦謝春  
色心猶惜衆芬種梅花似雪不畏早霞薰

題海帆孝廉海上釣鼇圖

士有奇氣橫高邱下與江漢相爭流長鯨巨鯢不足取釣鼇直  
上滄海頭鼇身十五鎮坤軸帝遣羣靈護湯谷神山沒後海雲  
深傾倒珠宮龍夜哭君家謫仙負奇才當時曾到滄洲隈長虹  
一落東溟開金鱗耀彩雲中來珊瑚裂斷風雨衣錦仙人今

羽化黿背煙波高比天縱有金鉤誰敢下仙風萬里來雲端吹  
君直犯星斗寒笑指蓬萊水清淺戲呼海若來扶竿雪絲落水  
雲煙黑水亦翻空敵人力黿身忽轉天爲低蛟龍遠遁陽侯匿  
方壺圓嶠何崔嵬巨首未仆瑤島摧君今欲去且低徊海色昏  
昏連九垓爲君喚起瀛洲客早向蓬山築釣臺

左筐菽光栗園張小阮姚石甫秦淮夜集

薄酒不成醉微風驚乍寒高齋愁日晚暝色起雲端坐久轉無  
語情深難盡歡素心誰可託憔悴楚江蘭

張烈女詞

代

朔風凝空露華結碧海青天同一色玉京仙子抱芙蓉歸卧瑤  
臺泣孤月月死珠傷彩雲缺悲風下其寒泉咽可憐阿弟數緘  
辭寫盡千年杜鵑血空山花木凝啼紅朝朝畫閣悲春風當時



咏絮馳華藻七德含章巾幗少薄命天教失鳳簫紅顏一哭成  
秋草傷心蕭史未東來玉樹摧殘暮雨哀終天恨血歸荒土一  
夕芳心作死灰生離死別泪如積地下人間期太促貞魂若化  
連枝松應傍山頭望夫石

爲程蘅衫題畫

生不能求白雲鄉乘風直至光碧堂亦宜歌笑樂山水下探石  
室上雲廊千金買地種香草羞與桃李爭春芳程君意氣凌清  
蒼片帆昨夜過雷陽示我風前圖一軸中散園林紛在目波光  
山氣逼人來空翠紛紛如可掬人生行樂須及時林泉笑傲鸞  
鳳姿山鳥不言日空曉巖花自綠春無私知君心與煙霞契洞  
天得此非人世幽居且爲此身謀廣廈休忘他日計我亦江天  
落拓身幾時共約下蘭津披圖一笑雲生春請君更向寒溪外

添寫扁舟載酒人

得石甫手書詩以答之卽送其公車北上

鸞鶴羣中獨少年傳來消息在雲邊  
高秋誰惜劉蕡策皇路先驚祖逖  
鞭桃葉歌殘人影外杏花春到馬蹄前  
阿兄新築瑤華闕待汝歸來月正圓

書中問余婚期故云

題石明經樵壽圖

小隱在青山深林獨往還浮雲空世外  
野鳥自人間有酒百年醉此心終日閒  
清歌待明月春色滿柴關

泊金剛鎮寄鄭明府

身世浮沈水一杯不堪禿筆掃風雷  
江聲已共雲東落帆影難隨雁北回  
絕岸四圍迷曉色遙天獨立近高臺  
匡山使者須相諒莫怪劉郎去又來

奉懷曹扶谷先生

不到元亭久春風各一天夢尋燕地月心折楚江船家遠官翻  
累才高世易捐生平困場屋知己讓公先

豈有空羣骨當時遇九方哀鳴羞道路顧盼起風霜一別書難  
寄三年草不芳何時披宿霧重到日星旁

孟塗後集卷二

桐城劉開明東

送程衡衫入都

傳聞征旆向長安千里春心託素蠻  
路繞黃花知鎮遠劍飛紫氣覺天寒  
一時遭際騰霄易數載交情話別難  
去看燕王臺上月故鄉回首暮雲端

燕臺勢聳接神臯縹渺丹霄幾鳳毛  
雙闕曉開人影度五雲春壓

帝城高郎官講學冠裳集詞客登壇  
意氣豪珍重大羅天上路好將玉酒浸櫻桃

臨風欲唱渭城歌暮雨空江奈遠何  
風信幾時通碧海客星昨夜渡黃河  
半牕離夢花前落三月春愁馬上多  
若到京華懷舊

雨可能含笑對庭柯

飄零踪跡等流蘋顧影空憐謝氏巾霄漢詩名成瓦屑江關生計本風塵辭家君自趨金馬出世吾終愧石麟倉卒故人江上別高樓北望隔蒼旻

江樓卽事贈師荔扉明府兼示座上諸友

青沙白草路回環飛閣平臨杳靄間天外寒生三島月夢中雲濕六朝山詞人放迹情無賴循吏憂時鬢欲斑淮泗未全聞底績諸君且莫羨鷗鷺

愁多正見大江來更上江頭百尺臺煙水無端人淚落秋風未急雁聲哀憑高豈展凌雲氣弔古終思曠代才但使眼前皆俊傑腐儒何礙坐啣杯

寄懷姚三石甫

欲隨彼美將蘋花悵望江天日又斜別後雲山空過眼近來春  
思半離家香消南國空芳草人立西園隔斷霞聞說星河高有  
路時石市捷南宮天風容易送仙槎

早年才筆走風霆金峽瓊臺次第經漢苑高華司馬賦蜀江蕭  
瑟子雲亭天邊瑤草憐新綠雨後春山變舊青知否關城楊柳  
曲玉驄別去少人聽

大雷池畔水東流日日煙波起別愁千里夢魂長伴汝一春心  
事倦登樓尊前花落徒聞笛冀北天寒易報秋早拂征衣回故  
國滿江紅樹待歸舟

題姚聽泉憶故居圖

雲氣淡孤素幽人空復情園林風日遠官閣舊愁生流水自環  
繞青山如送迎蒼茫煙靄處似有發樵聲

我有羅含宅苔深徑欲埋白雲在高樹芳草滿空階一別不離  
夢十年孤此懷只應圖畫裏攬勝與君偕

秦淮曲

阿儂年小愛歌曲日向歌樓傍花宿恨殺東風似剪刀斷取半  
江春水綠春水迢迢江路遙版橋明月照吹簫暮寒不奈春衫  
薄聞說今宵又上潮城南日暖鈿車出枝上黃鶯啄香粒拾得  
櫻桃不肯餐歸來戲置紅欄干

秋風曲

秋風起白蘋飛搖落江心君不知君行渺渺隔空渚日暮江光  
淡容與神物飄零烟雨多孤懷宛轉向誰語

花燭詞

傳聞青鳥下崑邱七采煙光接斗牛正愧賈生游漢闕敢云蕭

史在秦樓芙蓉繡過丹霞錦桃李春同碧玉甌自有琅玕陰滿地不須風信報簾鉤

屏開孔雀映璇題路入瓊臺霧不迷度曲聲來銀漢表吹簫人在月輪西花籠曉氣香初暖柳拂春風影正低從此高堂同問寢含情細聽五更雞

繡帷斗帳近朱櫺香散瓊枝露亦馨共說靈蟾輝玉闕豈無彩鳳駕輶軒河邊仙草由來綠雲裏春山別樣青漫道笙歌花月夜有人天上望三星

本來眷屬近瓊都良夜燈前認故吾未必王昌真快婿可能張耳是賢夫天孫機上傳雲錦仙子聲中唱繡襦一樣永年舊相識香風吹度碧紗幮

瑤華昨夜發江鄉瑞靄斜連玳瑁梁幾度彩雲飛北院一時春



色滿西廊我尋陶令來彭澤人說喬家近皖陽飲罷瓊漿游閬苑庭前好看紫鴛鴦

流蘇隱隱護伶俦透得香煙入畫屏臺上催妝皆月姊雲邊聽曲認湘靈詩成却扇詞雙疊春到蓬山路幾經莫把佳期方七夕牽牛恨不是文星

小小多情佩蕙纓十年枉自說尋芳虛傳神女游南國不分佳人在北方隔幔昔曾羞郭相裁箋今獨效繁郎仙風只到瓊華館那識盧家白玉堂

紅墻休更說銀河繡閣華燈豔綺羅百兩香車江上少十分明月鏡中多丹山書自高臺降碧海春從子夜過但使名齊漢京兆彩毫何惜繪雙蛾

贈王四

昌黎手抉天章後碎錦紛紛落塵土君從何處拾得之織就雲霞燦星斗搜索瓊都無遺珍真宰聚謀懼失守有時舉筆招天風蒼龍出水盤空濛芙蓉射日金耀采寶刀鑿碎鮫珠紅又如赤堇山中裂月斧鑿處石流血琅玕劈破雲怒生五丁反走天無色我從絕壑登君堂英光四射生寒芒君家兄弟俱連幟太華少室爭低昂卷中冰玉出相示彷彿丹霞羅海市古鼎斑斕風雨痕怪石礮礮熊虎勢我亦煙霞野鶴姿高吟強效陽春詞腸枯覓句苦難得百怪走出笑我痴吁嗟乎大鈞正響日陵薄洞庭葉下風蕭索蟋蟀噪耳羣蠅鳴誰起軒轅張廣樂願君力持風雅輪與我同歌赤水濱碧華擷取深洞杳雲海貽蕩空無人

將去金陵留別同人次姚庚甫韻

潮落江空泊曲潯天寒別思爲君深片帆去認來時路孤月今  
懸昨夜心異國風流仍舊識浮雲身世幾知音拂衣共此看長  
劍霄路迢遙信莫沉

月夜過太白樓

天上餘孤月人間獨此樓惟公堪一醉與我共千秋碧樹迷仙  
迹青山憶舊游登臨無限意雲水自悠悠

登金山寺

煙水東南四望迷孤峯突出共雲齊江流一綫橫空斷天壓三  
吳到海低濕霧開時微辨樹陰巖裂處更無梯題詩莫近馮夷  
宅恐有鯨人半夜啼

傑閣騰身忽九垓中流俯視激奔雷濤聲怒挾飛雲上海氣遙  
浮孤日來地湧珠宮侵斗極天懸石徑作樓臺風流不帶人何

在弔古蒼茫酒一杯

浩渺遙天碧四圍波心影動漾珠璣中江空翠高難落絕頂寒  
雲凍不飛北固層臺猶曉色西津遠樹忽斜暉闌干倚遍當風  
立矯首還疑近太微

青霄金碧盤飛閣紺宇龍蛇走畫題鐘動響隨天共遠鳥飛勢  
向塔爭齊風霆日夜空中出吳楚帆檣望裏迷看遍滄波千萬  
疊纔知身在海雲西

平山堂醉題

我有廣陵散妙音無與同攜琴下淮海持以問春風春風未到  
我先來東閣梅花不敢開買盡揚州二分月未能供我黃金盃  
且凌飛石登高臺平山舊號宴游地畫棟雕梁出空際到眼都  
成金壁輝拂衣似有雲霞氣老僧驚出把余臂共踞蒼苔攬飛

翠巖寒十月游人稀天遣謫仙來一醉名泉瀉出石橋東日斜  
倒映珠璣紅天光四入煙濛濛竹林深逕餘殘雪風掃高亭堪  
潑墨花空柳禿草不春我來頓覺生顏色淮南鉅麗此稱奇水  
村山郭望迷離望中風景如舊識我今便擲凌雲筆醉翁有知  
應嘆息

揚州雜感

飄零淮海又停驂煙水維揚色蔚藍終古樓臺皆畫裏可憐花  
月擅江南雕簾藻井香空覓殘雪深宵酒不酣便欲攝衣向東  
閣早梅先共故人探

開府當年擁翠翹華燈高宴設紅綃招來閨苑三千客同上春  
風廿四橋花帶微寒催送酒月留深院照吹簫彩雲飛散關城  
暮蘆荻蕭蕭氣寂寥

畫閣新開映紫氛年年簫管醉斜暉  
瓊花自昔難重見明月如今尚二分  
羅隱文詞餘宿草高駢仙迹總浮雲  
登臨不比延和閣小語何妨太乙聞

花作欄干樹作屏珠簾十里護伶俜  
岸雲倒影連空碧官柳無風拂黛青  
望去煙光生錦席飛來山氣入高亭  
樊川覺後春如故從此揚州夢不醒

香霧朦朧不掩牕隔簾雁過影雙雙  
千家花落猶春色八月潮來變曲江  
夜半人吹金鳳管曉寒風送木蘭艤  
婁迷楊柳平山路飛閣修成駐碧幢

尋芳休問玉鉤斜千載香殘怨翠華  
衰草不言空故國暮鴉無定又誰家  
錦帆飄渺雲中路舊夢荒唐曲裏花  
最是迷樓徑蕭瑟行人疑似認煙霞

茱萸灣口影澄鮮  
荳蔻稍頭春可憐  
水調尚傳歌吹地  
酒旗空映夕陽天  
一秋潮信思枚叔  
三月煙花問謫仙  
每上蘭橈更回首  
竹西近在碧雲邊

朱舫牙檣看欲迷  
微茫村郭影高低  
游人載酒長河下  
使者巡鹽大海西  
湖勢南趨皆澤國  
煙波北望接金隄  
崔巍后土祠何在  
畫壁無由問舊題

歸自平山堂道中口占

瓊枝璧月未銷磨  
一路名園任客過  
好景半從平地起  
飛樓曲共亂雲多  
斜陽欲落山含翠  
河凍初開水不波  
往日玉鞭催馬處  
紅橋幽怨復如何

將去揚州

湖山到處總堪憐  
風景由來此地偏  
城郭四圍皆錦繡  
人家終

日對雲煙垂楊似帶藏春意修竹高寒欲暮天早識銷魂惟惜  
別前寄悔泛廣陵船

過西園水榭贈吳山尊學士

蘭臺鸞鳳久超羣五色霞章手自分江遠早停天外策日高先  
見斗邊雲凌空亭閣留仙住隔水笙歌入座聞依舊蕪城衰草  
地賦成深愧鮑參軍

傳聞車騎出京華小住揚州爲近家招隱不須勞桂樹歸期未  
肯後梅花十年夢想成新雨半夜江星照客槎尚有梁園舊辭  
賦待公前路話煙霞

別李喬生先生

寒天沉舊響空水見孤清偶與高人語應憐出世情煙雲時往  
復星月看爭明坐到忘機處階前鳥不驚



吾道自霄壤百年惟寸心  
青春怨香草白日望高林  
復此城隅別相知江水深  
亭臯更西去鴻雁渺追尋

題焦山

吳越山光楚水船蒼茫又落酒杯前  
平臨倒景仍無地深入空青不辨天  
峭壁中開雲四合危樓直上日孤懸  
人家北望知誰是城郭依稀數點煙

浪下金山勢未停尚餘怪氣入蒼冥  
怒衝石壁千尋出分得江山半面青  
無塔亦能擎日月有人曾欲卧風霆  
不須醉踏金鼇背擲筆雲飛最上亭

孤影橫披萬古留東南天地半沉浮  
排空石氣高穿樹近海潮聲早上樓  
宮殿四時崖內隱雲霞千里望中收  
幽奇獨自開生面不向京江占上游

風急聲疑鶴鶴哀側身霄漢一徘徊江心鎖鑰天重設斗畔龍  
宮日又開雲去海門從下走水過京口尚東來誰言絕壁人難  
立看我吟詩問帝臺

留別左二僮菽

出郭身心各去留別君猶自戀江樓五年悲喜深今日一夕高  
吟忽晚秋花好祇宜供客醉雲多莫便鎖鄉愁故人作令勤相  
約應擬浮舟越海頭

京口贈左蘭城

拂袖南天又夕曛煙波閱盡獨逢君卜居直欲離人世落筆還  
疑挾雨雲破曉鐘聲當戶落居近菽師葬過江山色入城分旋舟莫  
恨身睽隔鸞鶴從來本一羣

十載聞名忽到今幾回促駕又沉吟歲華漸向歸時盡江水偏

從別處深京口萬家高下樹秣陵兩度去來心相思此後知多少好向金山絕頂尋

贈許春池廣文

射策文章星斗寒上林宴罷五雲端裁來瓊樹生春易話到家山欲別難垂老鄭虔猶日下遨遊司馬獨江干亦知天末相逢晚風景還思倚劍看

爲荔扉先生六十壽

瀛海滄波玉苑塵起看若木尚高著書已定千秋業織錦曾開八詔春星自斗南瞻楚粵人從天外拜崑崙樽前挾得飛龍杖不羨瓊臺九色麟

花城詩館近江村循吏儒林好並論臺省多年驚鳳藻東南同日望龍門一官人自思彭澤百里才難限十元尚有防身鱗長

劍西歸將欲倚崑崙

大雷今昔頌慈君北海飛樽又曉曛楊柳門高風送酒梅花春  
到客成羣七千里外開雲宴二百年來纘舊聞

時方著  
漁繫

休道故

鄉迢遞隔天留璧曜照南雲

自識荊州已六年憐才獨覺性情偏文章知遇人間遍喬岳聲  
名海內傳天遠每難忘別後我來悔不在春先憑將一紙珊瑚  
樹獻作筵前十丈蓮

孟塗後集卷三

桐城劉開明東

曉發棲霞最高峯

層巒直上立空冥  
客到山僧夢未醒  
秋遠無邊窮曉日  
天低不動倚孤亭  
江頭霜霧三吳白  
雲裏金焦兩點青  
咫尺御河巡幸地  
琳宮曾見翠華經

由大雷泛舟江上夜泊

夜色分明接水天  
小姑獨立大姑眠  
若教朗月爲妝鏡  
江面湖心影並圓

重過星渚奉贈鄭明府尊人柳門先生

寶刀出匣如龍起  
勢欲直斷西江水  
琅玕一截笑容紅  
故人俊

快有如此由來神物出不常先時天賜雲霞章彩羽驚人本丹

穴凌霄老鳳鳴青蒼著書作頌耀芳烈七百年來守先德

先生為義

門二十世孫

生平愛看青山雲晚與匡廬成舊識我昔維舟步蘭皋

見公如見匡山高一語徑走秋江濤別來三載拾瑤草又遇仙  
顏如舊好郎君種花出高枝朱霞已拂半天陲感時夜話月爲  
住公亦傾倒黃金卮獨有匡君向余怒似怪此時來太暮天花  
昨歲舞雙筵何不早進瓊杯露人生隨處春風集稱觴何必分  
今昔願招五老飛下天手攜雪藕大如船飲公九疊屏風巔青  
鸞在右鶴在左爭向層城獻花朵碧桃樹下錦煙生小住三千  
年亦可春回山麓多仙羣李白玉杖挂斜矚試爲先生拂白雲

滕王閣

西山曉色遠參差勝景登臨見始知曠古風流空有閣一江雲

物不宜詩少年轉惜名成早異代應憐我到遲  
畫棟接空盡寥落無心更看捲簾時

酬竺堂觀察

九疊匡廬擁郡前山靈舊識使君賢已收長佩趨高座曾見飛

星照綺筵

余始到星渚時公攝理南康先蒙招飲

江月催人驚一別秋風吹客忽

三年鄉關同指南雲裡願把龍文挂斗邊

南昌感賦

西風一夕泊蘭艤鴻鵠驚飛影不雙地近蓼洲宜夕照天開彭蠡作南江  
煙嵐映水千帆翠野寺排雲四面牕

謂西菴

獨有書生游興倦十年壘塊酒難降

登高灑淚向穹蒼勝事南州異代傷下士久無陳仲舉斬蛟但記許旌陽  
崢嶸祠宇輝金碧寥落亭臺自雪霜夜上東湖堤畔

望波心霧重月茫茫

連旬夜雨正廉纖城畔花殘落葉添千載江聲搖鐵柱四時山  
色在珠簾水雲地廠仙靈聚興廢愁多別恨兼卻笑彩鸞市唐  
韻瓊瑤字迹欠矜嚴

千峯萬嶺阻南行怪石連空削不平痛惜豐城埋劍氣徒令高  
閣擅詩名司空博物誠難覓都督憐才莫漫輕憑弔不勝今昔  
感碧天無際暮煙橫

西山隱隱宿雲霞下有流泉曲徑斜終古洞天鎖瑤草當年處

士拒蓮花

謂陳陶

林巒合作幽人宅煙水曾爲帝子家莫羨嶺梅

風信早負他春色在天涯

學使潘芝軒少宰見問廬山風景及入山行徑偶書三絕  
使者星輅自北來曾看蒼翠到山隈欲知金葉芙蓉朶長在東



南絕頂開

黃崖瀑布自空懸流到龍潭別一天解識金絲吹不斷遠峯尚有玉簾泉

七賢秀色當秋變九疊雲屏帶曉寒除卻石梁人不度銀河都在杖邊看

聞楊柏溪先生赴任淮陽

勲望終當繼贊皇傳聞建節向南方胸中日月雙丸小眼底淮河一線長

公素講河務

白雪公能知宋玉黃金我欲鑄孫陽向來憂

國心長切曾否秋風兩鬢霜

寒夜

微雨侵孤夜嚴寒入艸樓此時宜中酒作客莫過秋懷舊人如病思歸夢亦愁明朝有風信東去問江流

哭荔扉先生

斗南星隕失名流  
知己生平望已休  
報策方思容一見  
到門不料隔千秋  
青雲有氣吳天寂  
白雪無聲楚客愁  
今日羊曇先痛哭  
雷陽城畔卽西州

英名自昔動三臺  
落筆風雷倒峽來  
生有文章驚海嶽  
死無骨肉送泉臺  
雲邊宦跡都成夢  
天上修文竟乏才  
滿目河陽桃李樹  
年年辛苦爲誰栽

頃刻遼東化鶴身  
可憐遭際總酸辛  
故鄉天遠猶無信  
夜帳風寒慘不春  
一死尙多難了事  
百年終是未歸人  
點蒼山色應如故  
只恐哀魂望不真

伏轅驥骨本孤寒  
屢荷孫陽著意看  
小別三冬留我住  
遲來半日見公難  
分箋不覺相知久  
勝會偏驚此夕殘  
多少悲懷和淚

說九原莫作舊觀

古意答張鶴肪先生

相逢怨春暮促席共沈吟  
可以慰終夕因之明素心  
芳華空自拾煙水爲君深  
且勿傷寥澗丹山有鳳音  
桃李艷春晚幽蘭不敢芳  
懷茲空谷意惜彼好容光  
素質無人採青陽獨自傷  
感君金石契永暮不相忘

余鐵香以寶刀見贈詩以報之

鐵香拔刀如遇敵醉舞虛堂動顏色  
十年藏篋人不知西江老蛟日爲泣  
昨宵持贈對書生似有秋風嘆不平  
已從萬里來江國百鍊誰知海日精  
倭人製出紅疑暈青鱗裂破英雄恨  
血花點點生寒芒六月驕陽不敢近  
壯士寶此不肯私神物離合原有時  
平生恩怨分明甚臨別猶存故主思  
一擲功名何足異

君金石同高義從今恥說昆吾利將刀換詩君莫疑我辭亦有風雲氣

將歸度歲留示鄱陽諸生

敢云能授太元篇識字真慙一日先久客已知吾道拙得師爭似古人賢莫嗟朗月虛無主須信春風到有緣珍重丹山初出鳳高明好向碧雲邊

湖山留我到而今風景名園未細尋植起梧桐新得露護來桃李望成陰勞人久已懷芳草諸子終當賦上林檢點門前行處路他時積雪夜來深

縱江道中

桃花滿樹亂鶯啼芳草連雲綠正齊三月春衣猶未換嘗寒人在酒樓西

酬覺生學士見贈四律卽以留別

投我天章下斗牛見公不負武昌游珊瑚願架松陵筆煙月欣

登庾亮樓離思豈堪聞楚曲雄心祇自付吳鉤

見贈有天上星河垂彩筆酒邊

肝胆向吳

此行再臥南州榻

時將往南昌

猶記平原十日留

高誼拳拳勝故知不才敢自負清時本因客久行難住偏是神  
交見轉遲傾倒金樽仍對酒坐低銀漢爲談詩臨岐有語公休  
怪別後還須念項斯

懷鄭夢白明府

別路迢迢又夕曛巫山西望淨秋雲巴船出峽超圖畫神女憐  
才費雨雲一曲歌詞空藻艷千秋仙夢亦傳聞瀟湘攬袂非吾  
願濯足滄浪正憶君

孟塗後集卷四

桐城劉開明東

楚中雜感

閱遍匡廬到楚邱探奇千里愧淹留地開豪傑爭雄局人得江  
天最早秋日出尙含雲水氣波流不盡古今愁本來城郭人煙  
雜何事神仙跨鶴游

門戶當年此壯哉波心鎖鑰爲誰開長江杯水資雄業明月詩  
篇識霸才南國三分天不競東風一炬我猶哀紛飛戰骨歸何  
處斷岸青青又草萊

登壇人物勝中州重鎮從來踞上游年少周郎悲異代才多宋  
玉惜逢秋千年憑弔難爲我三楚蒼茫有此舟名勝不須重嘆  
惜大江無語背城流

九真仙去覓無踪  
煙柳人家隔萬重  
水下荆襄餘怒氣  
山當江漢少奇峯  
已無高士能騎鶴  
尙有遺民說卧龍  
終是千秋雄傑地  
西來形勝壯堯封

余情渺渺阻江沙  
誰見黃陵廟口槎  
公子生徒怨芳草  
夫人死尙號桃花  
故宮已沼雲偏麗  
流水無言日又斜  
多少傾城亡國恨  
不堪王粲更離家

棲遲楚漢無長策  
吟嘯江城有夢思  
西塞雄名猶在眼  
南樓好月不同時  
惟應風雨能宜酒  
且喜煙波尙稱詩  
聞說荆山方產玉  
卞和沒後幾人知

竟使靈山氣不揚  
才人弄筆久荒唐  
鋪張暮雨爲神女  
附會雄風屬大王  
芳秀至今歸蕙芷  
山川從古出文章  
諸君莫說江南盛  
荆楚雄奇勝故鄉

天風日日起青蘋吹得章華迹已陳  
偶爾寓言傳下里何曾有客唱陽春  
浮雲到眼皆新藻勝地回頭愧古人  
覽盡漢南煙水濶男兒何必怨風塵

月夜重登黃鶴樓

黃鶴飛難覓碧天懸舊名樓空留有跡  
我見不勝情此笛已千古何人聞一聲  
祇應江上月重照客心明

初秋有感

十年空抱伯牙琴寥落山高水又深  
浪迹江湖生酒病早寒天氣入秋心  
故鄉近遠浮雲隔舊事分明去日沉  
可惜煙花三楚地客中樓閣罷登臨

南康道中

樽酒梁園賦未成長亭風景入離情  
古楓冒冷爭秋色疎竹敲



寒入雨聲江上懷人驚物候天涯送客又關城  
摩霄霜集猶無賴寂寞哀鴻況遠征

途中捨輿行山峽內有作

山行到此驚轉身兩峽怒出疑吞人當空劃斷深百尺倒吸天  
影藏重垠下爲絕磴上爲路奔泉之中來飛塵我循磴水入深  
谷白日不到積寒綠石骨豁露撐龍鱗草根下有金蛇伏亂雲  
穿破上崇巒足帶泉聲出山腹探奇不向高衢行獨從石罅求  
虛明濕霧撥盡苔花碎此後定有春風生

別潘柳塘

此別又千里煙波空復愁寒花初着色落葉正辭秋君有凌雲  
筆文如下水舟長楊方擬獻痛飲且高樓

偶憶

兩年孤棹泊江州。曾記高原雨後游。龍氣濕迷雲外徑。馬蹄寒帶樹邊秋。一溪白石堪留句。十畝青山不種愁。聞道隔江香草在。拾芳便欲向中流。

平野

平野多蒼翠。浮空入薊城。日蒸山氣變。風過雨聲輕。澤國陰晴易。勞人意氣平。又逢征雁至。殘月露縱橫。

寄周澗東

男兒生負七尺軀。胸羅滄海吞江湖。求官求仙兩無得。低頭草莽真迂儒。西游荆楚東三吳。霞氣隱隱生衣裾。當筵擲筆動開府。狂名一日傾寰區。竊聞石穴多奇書。徑叩山洞窺靈墟。白雲守之重。愁予山靈亦覺吝。顏色對我面。面皆模糊以茲踈。懶坐空室紫騮不復馳。路隅昨日江風忽來呼。引我直造君之廬。風

前相見出意表笑語未畢提玉壺春光淡蕩花色腴一飲千盞  
聊共娛肝膽披露在頃刻天日相照君豈誣我有卷裏青珊瑚  
君有篋底明珠酒酣出示各稱快一字直抵千璠璣君忽起  
立爲長吁謂我鄭重風塵軀慎勿持此入五都市人所寶惟硃  
硃我感君語開襟無別來一載思鬱舒風晨月夕誰與俱酒懷  
偃仄詩腸枯安得重登芝山頂濯足湖水升雲霓瑤花看遍千  
萬株醉倒共遣仙人扶

贈方小蓮

落筆卽風雷同吟問九垓生余偏作客縱爾獨多才雲水情難  
卻江山面自開阿兄傾倒極相見每低徊  
莫把鈞天曲徒然動鬼神素心須向我白眼漫看人惡客無輕  
發琪花易得春少年應自惜早晚貢麒麟

董竺雲以所畫海棠見贈

竺雲惜花兼惜墨  
篋有臙脂拋不得  
偶然染作海棠花  
筆頭漏泄秋顏色  
寫花容易寫葉難  
可憐嫩綠生微寒  
佳人現得全身好  
莫把他鄉醉眼看  
五更曉夢勞牽引  
嬌羞欲藏藏不盡  
兒女意態本自多才人  
狡獪尤難忍  
西風情思晚霞妝  
猩紅點點凝羅裳  
竺雲汝莫爲花忙  
此花不念人斷腸

朱檀園太守招飲庾樓賦此以贈兼示其弟浣岳

旌旆新看駐上游  
使君風雅稱江州  
孤懷欲轉三霄日  
一語能生六月秋  
掃逕雲橫徐孺榻  
開樽客上庾公樓  
請將珠玉當空擲  
定作長江九派流

買舟已赴看山期  
卻向城頭飲玉卮  
不分千帆先我過  
何妨一日爲公遲  
高朋意氣雲邊月  
難弟風流畫裏詩  
此去滕王舊仙

館捲簾爭及倚樓時

琵琶亭

白傅風流迹尙存  
蕭條亭外又黃昏  
人間多少英雄眼  
不把青衫拭淚痕

書感

大江直下浪雲寬  
繞郡魚龍氣鬱盤  
三楚風霜珍此劍  
廿年身世久憑欄  
歲華寥寂青陽晚  
澤國昏濛白日寒  
無限壯懷吟不盡  
尙憐舊雨在長安

謂張小院諸君

回星渚

又從馬上醉斜曛  
隔路樵聲夾路聞  
看盡閑雲人不識  
湖頭三渡謁匡君

重抵南州有懷

勝地重爲客殊方莫上樓孤他兒女願添我水雲愁梧竹今宵  
雨芙蓉故國秋相思言不盡且自付東流

望西山歌

西山聳立滄江邊擅奇江右千餘年松門石鏡俱寥落此山靈  
氣時盤旋城中可望不可卽四時色變隨蒼煙就中最勝天寶  
洞洞門開闢春風前入洞深黑杳無見洞底踏破驚飛泉泉飛  
路阻抵絕壁石壁以內卽青天山腹中空足難到時有一線金  
霞穿仙真住此長晏眠石床金几巧安設奇器不琢皆天然千  
花萬草盡瓊玉扶精有根空際懸洞天靈秀洩不盡結爲雲彩  
升山巔中當青嶂有梅嶺南昌仙尉修真境棄官學道移入山  
富占白雲數千頃又有鶴嶺近紫霄跨鶴過者王子喬吹笙當  
日鶴飛舞天臺桐栢亦洞府胡爲游戲經此方豈與吳猛賽騎

虎神仙踪跡原天涯名山處處皆爲家一生出入惟煙霞笑我  
三度游章水林巒久慕斯山美日日邀朋去未能今見山靈幾  
愧死人生最苦是飢驅覲面名山失路隅不向靈棲通款曲翻  
與世俗窮歡娛我聞天仙亦碌碌織錦仙女日拘束四十萬人  
縫彩霞猶說天衣尙未足採芝覓藥遍崖谷石割青紅水剪綠  
麟脯龍膏雜鳳胎更催甘露百千斛仙人亦爲衣食忙何況我  
輩客殊鄉十年奔走徒攘攘口說遨遊身不遂耳聞名勝心猶  
狂西山之游旣虛矣此言解嘲非得已石若聞之笑冷齒悵望  
遙峯隔江汴重重暖翠欲飛起他時定欲載瓊髓徑造山巖佳  
洞裏一雪從前食言恥謂余不信水西流此歌留質付南州

喜張鶴舫重至

孤館蕭條落照邊幾番騷首問青天徒令相賞千秋下恨不交

游十載前紫府我曾迷舊夢白頭君始賦游仙元洲瑤草終  
植好傍天池十丈蓮

彩鸞曲

紫極宮中天色寒野鳥來去啼仙壇書生當日逢彩鸞彩鸞本  
是吳猛女乃翁天半常跨虎擇婿不肯遺同鄉或者空際自爲  
主邂逅目成亦神許歌聲宛轉代媒語甲帳千年不畏霜山巒  
一夕能行雨民妻非謫乃所欲人世瓊瑤消艷福指甲紅鮮細  
眉綠手寫唐詩聊救貧桐花看過十二春年往人去仙迹陳城  
邊風日依舊新我來獨立三太息如何好事惟古人

贈黎楷屏

章水含煙曉未開客中風景倦啣杯驂騑只爲多窮骨鸞鶴從  
來有病胎舊雨重逢難盡意仙人未必定奇才

楷屏好輸君故  
仙故云



國羅浮蝶新帶家書出嶺來

答陸子愉

南州兩度見瓊枝珍重鸞雛出穴時湖海應憐吾負氣江天尙  
幸子能詩三春好景同離夢半載交情勝故知最是問眉新製

曲

謂題沈羅雲夫人問眉圖

一簾秋思雨如絲

笠颿方伯招同解鐵樵高蒼崖查花儂宋于庭諸君宴集  
飛霞閣

振衣不必干尋邱濯足不必萬里流祇此湖山入飛閣一覽已  
足窮高秋白雲飄渺來洪州曉寒乍散雲中樓樓前開府文章  
伯紫館量才玉爲尺龍門一扇關天南珊瑚爭獻瑤璫側昨來  
招我坐天風手挾雲騎開羣衆鉅野在北渤海東我思不得今  
見公意氣直與相流通高談疑到青琳宮幃帷已展華筵起羣

仙高會競文史天風送酒花壓杯四座無言我醉矣須臾暮靄  
散煙紫階前秋意涼如水更取明燈護輕綺諸君相與鬪瑤觴  
玉山欲倒強依倚仰見衆星如雲委明河低入銀樽裏先生浩  
興猶未已自從闔公宴滕王千百年來重見此古今盛會各一  
時金谷梁園未足奇今夕盡飲醉莫辭酌我大斗報以詩含笑  
更問舊相知坐中子安今是誰

題李蘇門贊府望雲圖

薄宦滯關河征途幾度過關心飛雁遠回首白雲多陟屺望無  
極臨風愁奈何倚門嗟莫慰歲月惜蹉跎

千里山難隔三春望獨深層陰迷客路寸草識君心我亦悲行  
役年來憶故林斯圖會有咏欲寫又沉吟

贈程韻篁明府

江城又報駐鸞驂仙館雲山喜共探  
六代煙花歸記錄一門風雅擅  
東南瓶留齒舊紅猶濕杯浸葡萄綠  
正酣宦性由來慕芳潔惟餘愛客不嫌貪

吳門佳麗勝維揚畫舫笙歌錦繡場  
偕得柳絲穿蛺蝶剪來花

葉覆鴛鴦曾傳神女三生果

謂露花仙子

又賦天孫七夕妝

謂七夕催妝詩

百韻話到上清惆悵事西山暮雨正微茫

作吏名山看夕曛可曾騎馬咏紅裙  
半生風味宜花竹數點秋心落水雲  
去似鳳凰欣結伴來如鴻雁不離羣  
得歸重製蘭陵曲歌向東風待我聞

孟塗後集卷五

桐城劉開明東

過婁妃墓

千年戈船一戰已玉顏獨自沉江底君王不聽賤妾言身葬江  
魚心不死宸濠非故生禍胎謀因武廟荒淫來燕藩舊變乾坤  
局此例如何可再開化家爲國豈細事人力竟不度天意花月  
朱門懶晏眠斷送頭顱太兒戲閨中苦諫偏執迷誤認鸞鳳作  
牝雞賄盡宮中徒破產臨危痛哭記妻啼亦知當日乘機起事  
後論人誤青史若非上游王伯安直指南都事成矣解識神器  
有定歸百萬軍輸一女子貞魂冷落傍江濱寒食何人麥飯陳  
墓前不種閒花草愛近東風虞美人

螺墩行

君不見仙人舊館已零落此墩胡爲起南郭萬金立破一時作  
花鳥雲煙共揮霍高樓牕敞天寥廓飛翠落地波先著西山來  
親不能卻從此遊人足歡譁開筵無復滕王閣誰道江南第一  
觀不及閒雲尺地寬眼前人物各稱美何論高名王子安世情  
較勝春煙薄但識新故無美惡風景何關炎熱事亦將衰盛分  
今昨堞墩之地臨水濱收拾洲頭無主春吞吐煙靄寧不新可  
惜譽者皆游人

將遊西山柬陸子愉

西山高處接層霄空際浮雲濕不散入天風成暮雨吹來秋  
思滿江潮樓中羈客徒哀怨洞裏仙人亦寂寥安得身騎蓬島  
鶴攜君絕頂醉瓊瑤

百花洲口占

可憐百花洲但餘一湖水不是月飛來那有秋到此

赴粵東留別笠瓢方伯

聞道羅浮曉霧開珠江風色自南來海天花月非吾意嶺嶠功名有將才謂蔣制府挾策願投班氏管感秋須上越王臺扁舟深入玻璃國猶記中郎坐上杯

辭將雲漢下神皋嶺上梅花笑客勞此去且看滄海近歸來遙指歲星高先生屬望原犀角賤子虛名愧鳳毛尙有寸懷言不盡隨風吹作贛江濤

贛州口占示張效三

怪石嶒嶸是贛州亂山深處水爭流客中身健原非福別後書勤總是愁十八灘頭仍舊夢二千里外共孤舟艱難歷盡君休歎歲暮輕寒尙早秋

抵廣州呈曾賓谷方伯

我如野鶴游人間往來石室經霞關青山雲薄不耐冷一夜飛  
過梅花嶺公如威鳳翔九霄高鳴萬籟齊寂寥筆底雲錦爛五  
色天女爲織生龍綃自從文彩重阿閣百鳥環之塞寥廓公以  
片語釀陽和揮手天風來絕壑不然壇上建雲旗縱橫數字皆  
雄師精氣憤與海吞吐神力似有天扶持宇內鴻詞霹靂手但  
見長城拜恐後嗟我落落天外身手折芙蓉趨座右華筵昨啟  
喧歌臺彩雲片片隨風來一堂收盡東南材使君意氣何壯哉  
舉酒澆月天爲開南州楊下時相見晨夕高談極歡宴嶺南風  
景歸我胸只可惜未窺羅浮面興酣公欲凌蒼煙煙雲無心石上  
眠招之不來用詩篇驅使山靈走百川雕鏤物態春無權驚紅  
碎綠紛可憐我與公立天花前仰視琳關心茫然且酌玉液烹

靈泉杯中明月壺中天一醉已足三千年大笑天上無神仙公  
言真仙住人世洞天別自開奇麗安期近傍海霞居住而求之  
在雲際仙竇實大熟太遲得食菖蒲福非細我思公本金仙儔  
珠光照處空千秋清才濃福兩擅絕姓名早已懸丹邱願從公  
授太元訣使我滌垢納芳潔細嚼白瑯除內熱空中五羊跡可  
行不須更覓瑤池雪

送周伯恬孝廉歸里

曉色一樓開天風送酒來別君滄海曲坐我白雲隈痛飲極歡  
思飄游憐異才得歸臥明月應憶嶺頭梅  
水氣共煙嵐途中好自探此心飛嶺北先子到江南別促言難  
盡情深興易酣送行偏不妒我亦整歸驂



越城風日易寒溫  
攬勝雲邊舊迹存  
異代幾人如陸賈  
荒祠有客弔虞翻  
峯低樓竟遮山色  
地暖花難著露痕  
官閣醉眠無一事  
虛勞啼鳥報晨昏

海煙東望虎門開  
波靜長天息怒雷  
點綴春風無士女  
鋪張金碧有樓臺  
江流已洩豪華氣  
嶺險曾容割據才  
形勝祇今歸內地  
安邊莫遣動纖埃

半年作客滯江河  
况復孤禽去桂柯  
別後相思天外隔  
古來名宦嶺南多  
紛紜珠翠空人物  
棄擲煙花豔綺羅  
搔首千秋聊歎息  
英雄獨惜趙王佗

水雲同醉野鴛鴦  
翠竹何曾見鳳凰  
幾處歌聲宜落月  
四時春色送斜陽  
人逢酒市偏傾興  
地近花田轉不香  
漫怪孤城游客盛  
昔仙多事跨神羊

拱北樓刻漏歌

倒轉羲和定晨夜，黠水竟能奪造化。四壺高列樓上頭，壺中獨  
自分千秋傳聞妙製。延祐起抱箭不須用，銅史吐瀉分陰成歲  
紀。五百年來獨見此，我聞蓮漏二十有五聲。風塵淪沒存其名，  
又聞芙蓉十二玉津濕。銅葉摧殘土花泣，此樓何幸凌青穹。靈  
泉注景似龍汲，日影浩蕩雲天寬。一滴不盡人問寒。

呈韓桂舫中丞

曳裾久願識荊州，一見真輕萬戶侯。星過斗南輝上國，海從天  
外納羣流。陽春此地無今古，多士因公卜去留。見說池蓉紅近  
府，幬幬遙望卽瀛洲。

家聲舊重鳳凰池，累代文章四海知。後出勲名推上將，橫行壇  
坫本雄師。

殊恩

帝許頻歸省大雅天教力主持不信豫章凌碧漢也容蔓草附高枝

名勝西南數粵東羊城卻未佳花驄不期蛺蝶先招我轉賀羅浮得傍公宿霧披時親朗日明河低處坐春風憐才今有韓忠獻肯使詞人歎轉蓬

望澳門

極目神州盡羣山止澳門一川通海國萬怪鬪乾坤地暖春光淺天荒賈客尊十方人物在鄭重作藩垣

風景真迷漫蒼茫海色連鮮紅新浴日濃綠古時天人與蛟龍熟客同星斗眠不須分外內世界總如煙

見說樓船集雲從纜底過境寬魚鱗壓地少水天多夷女爭奇

飾蠻人善笑歌海神須靜鎮

盛世莫揚波

喜晤石甫

高天鸞鳳久離羣惆悵江東日暮雲別去六年應念我南來千里爲尋君故山花竹空明月近海樓臺變曉曛高館相逢須痛飲挑燈好與細論文

粵中雜詠

百粵風煙極望開滿城名勝共登臺謂同姚山窮不覺南天盡地僻能令上客來千載壯游悲往事一時持節總多材暮秋遠別原無賴幸有高筵北海杯

漢臺鐵柱已沉淪回首璇亭甲帳新石峽分將天半月宮花奪得海南春歡娛社稷辭良夜歌舞江山換主人四十七州輕一

擲可堪珠翠亦蒙塵

香田不比玉鈎斜  
竟把紅塵掩紫霞  
啼鳥林邊誰是主  
美人身後尙爲花  
千年荒土猶春色  
五季零芳豔月華  
不信故宮寥落後  
風煙來道屬民家

荔枝灣口水生紋  
望裏千村傍曉曛  
海氣噓來長有雨  
山嵐鬱

久不成雲峯頭館爲何人立

謂越華館

天末亭將遠翠分  
獨惜安期

無地覓玉門棗熟又餘芬

波湧崖山岸不知樓船影  
蕩碎琉璃全邊地險分三路  
一日天光併四時  
滄海無靈徒內繞  
碧霄何意更南垂  
炎荒自昔誇風景  
辛苦坡翁獨賦詩

游蓬勝境慙爲客  
行到層巒始覺秋  
龍戲日珠紅照夜  
鯨翻海影綠侵樓  
花開地有留春力  
歲晚人無落葉愁  
挾策王孫最淪

落徒將詞賦動諸侯

水調江天久不聞卻從高館話離羣  
潮來曉霧都成瘴日暖秋光不受雲  
風俗但知崇俠氣山川未必吝人文  
請看昨夜張燈晏多少儒冠傍使君

禪扉隱隱出塵寰靜到枯僧尙不閒  
有願誰尋蒼玉嶺無言且對白雲山  
信沉紫落虛無內仙在滄波杳渺間  
卻羨羅浮舊蝴蝶羣飛從不出梅關

寄懷方竹吾

不見雲中尺素書近來情思復何如  
嶺南十月無風雪愁折梅花問索居

北園風景擅家山翠竹重重認客顏  
想見月明人夢覺萬竿影動鳥飛還

龍眠泉水響春雷流過門前岸忽開君昔招人看山色白雲無  
意出林來

白雲山歌贈胡春海司馬時春海約游不果兼以嘲之

白雲山上雲千疊雲中峯與青天接芙蓉朶朶皆金葉白雲山  
下春一年人家種滿花萬千山氣近與城樓連舉杯就山遠無  
極登山望城如咫尺夕陽移送金碧輝山面映成班剝色廣州  
山少煙漲多近城便覺形嵯峨山中雲駟時相過曾否人衣古  
薜蘿屏藩南海氣吞吐天教作鎮出雲雨炎荒地遠神不爭讓  
與安期作山主我與君約窮幽奇春風已到猶愆期洞天待我  
破荒寂十日不至生怨思君擁豔姿坐瑤席日日爲花助芳澤  
不暇去探仙靈宅我觀君詩勝時賢駿馬欲起先僵眠一句直  
作千盤旋偶然下筆寫巖壑破石能教洞腹穿此游不遂孤林

泉交疎或是山無緣山雖無緣未孤冷佛廟香煙盛高嶺池日照忙爲人影車服光華笑語聲閒雲一見飛且驚仙人莫謂身清靜居在深山亦市城蠻花村豔恣婀娜女兒一證菩提果一路紅妝來道左山花掩映真如火如此名區緩游可風光不稱客淒清煙月應嫌人懶慵此山胡爲號白雲雲多于石世稀聞安期以雲換吾文持來試與君平分

上蔣礪堂尙書

九苞大夏早知名命世爭傳嶽降精

帝爲海波思砥柱公來嶺塞卽長城畧窮文武裴行儉節耀冰霜宋廣平重起西南天半面全憑隻手斷蒼鯨

恩榮東海還南海

公以浙撫督粵

聲望詞臣又重臣咳唾三霄雲變雨

指麾百粵地回春中天日近臨紅旆上將星高傍紫宸我昨西



江逢父老甘棠說到召公親

靜握珠囊力獨支

九重南顧識無私  
救時迹隱蒼生賴  
謀國心勞白日知  
筆挾旋風驚判速  
香焚深夜覺眠遲  
公門桃李栽來遍  
多少新陰附舊枝

鰕生敢愛涉關河  
暫別淮南桂樹柯  
地迴竟容凡鳥噪  
山高不礙片雲過  
從遊幕府瞻羊陟  
訪古荒臺感尉佗  
曾向芙蓉池畔立  
纖鱗可得借滄波

卽事

梅嶺迢遙隔蘭橈  
宛轉通岸雲連海  
黑樓火照沙紅曲  
水笙歌集明珠組  
織工宴遊吾未厭  
孤貧說春風

玳瑁千家飾琉璃  
百尺船珠娘來月下  
玉盞奉君前赤足  
當花

立朱顏得酒鮮消磨春太盡昨歲又今年

繡屋籠深霧高樓傍晚霞鴛鴦移澤國孔雀住人家地暖宜栽竹田多但種花驚心紅紫遍無處覓桑麻

竹布來深谷花梨積畫堂千金求異產滿市盡名香翡翠看人拾琉璃當石量陸生囊果富堪助粵中裘

共說風蘭好吾偏喜木棉開來霞十丈紅如日千年景物春如許繁花夜可憐負他香色地只爲愛孤眠

不謂東君到花神日夜催芙蓉憐我瘦桃桂並時開物候驚羈客春工亦異才能言數鸚鵡對語費疑猜

茉莉香纏鬢檳榔樹繞廬佳人多識字貧女善鐫書紫硯心憐久青瑤手校餘海天增韻事佳話補樵漁

寄懷龔西園先生

高崖憶昨跨飛鸞同上匡廬舊石壇一霧驚教湖面失萬峯忽  
斷馬前寬于今嶺海空秋色自古親知共歲寒何似單車賢太  
守惜芳樹遍楚江蘭

桂舲先生以五言四百字見贈賦此奉酬

幽蘭隱中谷未得窺朝陽羣木更隱蔽竟日無容光何期接君  
子引置千仞岡托根因地勢物性寧改常移植未云久清芬已  
遠揚始不出林表繼乃聞道旁春風使之然寸草安能芳

瀛海環九州天柱鎮八極隱隱慶雲浮紫氣護靈域中有一金  
仙與我昨相識脫畧天與人乍見稱奇特如植龍門桐不以雜  
荆棘食我丹瓊脂酌我絳雲汁我醉不能飲厚意辭不得因之  
忘夜闌冷月散華飾

鸞儻忽又頒瑤章錫硯北九成金石聲七采雲霞色獎掖何過

情憑虛假羽翼讀罷喜且驚起立爲太息遭逢亦天數敢自矜  
才力明鏡懸中天有美詎能匿但愧樽散姿藻繡勞雕刻仰望  
琳闕高遲回風四集我情言不盡願以銘胸臆

卽事續咏

徽省前藩府紅蕉變綠天鷓鴣啼不斷蝙蝠久疑仙深院無歌  
舞悲風代管絃空餘舊奇石冷臥夕陽邊

蝴蝶絲成繭珊瑚葉作花挿來豔兒女服去爛雲霞勝境堪消  
日游人不憶家徒聞歸舫急趁買武夷茶

迎春時欲近錦繡鬪奇瑰共訝東風至同看彩架來紫綾裘異  
樹紅粉坐行臺可惜孤燈節星橋夜不開

深淺鮫人宅輕纖蛋戶身採珠時望月生女正當春簾奪紅藤  
豔譬憐碧玉新盆花方作記報與渡頭人

順德城邊水兒家住幾灣但看三月樹已勝百花山少婦誇纖  
手諸姑亦妙顏採桑道旁坐指點亂雲閒

春早邀同伴閨中認友生羣芳誰最長獨嫁恥先行花社風流  
會香天豔俠名壻家休見促阿姊未諧盟

桂酒羅浮釀沽來不解愁花田長似霧月榭暗生秋海燕家無  
定人魚淚未收君看煙霧外落日在洋樓

香露鎔爲水花銀鑄作錢壓來天外載購自海西船池館開金  
碧波濤渡歲年島間望明月來往幾回圓

棧屋居香客雲房列海珍靈螺心九孔老蚌孕千春剖出紅凝  
血攜來綠照人所嗟非菽粟不救廣南貧

碧眼洋姬麗紅毛鬼國遙有家住雲水嫁媚恨風潮金粉腥  
重蠻荒豔色嬌看人偏斌媚采線自纏腰

飄渺瓊枝白離奇鐵樹紅花曾開海嶠信不託春風黎母天婚  
早魚翁井水空誰將王會物細寫獻

述懷

騏驥伏轅下終歲淪風塵神駿落人手英氣何能振霜鬣動風  
日天骨超羣倫奔走長路閒欲前轉遽巡僕夫不知惜鞭策任  
加身寧知伯樂過一見稱騏驎牽來白日下解置赤水濱矜寵  
出望外懷懼未敢親長鳴雖聽許此意難具陳

香草媚江皋日夕盛芳飾須臾涼籟生凋此芙蓉色良時不可  
再幽懷忍終默吾聞越石父乃謝齊相國獲罪寧不懼知已誠  
難得

寄瓊州太守

昔卧宜城月今窮嶺塞煙一州深入海四面只餘天垂老愁經

險多才合濟川邊城重瘴內有客爲心懸  
西望仙梯外蒼波不見垠日南還有國世外恐遺春占候黃支  
使調停赤髮民珠崖千里地風物看重新

贈李鳳岡太守

越疆千里播威名止水冰壺見宦情射策文騰雙鳳闕剖符春  
到五羊城同時人物推先達今日循良屬老成不見高吟滄海  
上有人詞作怒濤聲

與石甫夜話有贈

積習來有自獨立難與爭飛觀起雲漢百尺何崢嶸其中富樑  
棟寧資一木成姚子執古誼詩書發深情志欲挽頽俗不顧並  
世驚所願未能遂先已飛謗聲雲陰掩華月新霽翻增明言者  
自相煽君意方縱橫論辨豈不偉母乃氣未平我有千日酒願

與君同傾飲之可長醉浮沉任物情黃河且昏濁滄浪爾何清

奉答賓谷先生冬日示諸客之作

彩羽三霄外卿雲五嶺旁名賢推柱石使節鎮巖疆布化陽和  
轉推

恩雨澤滂力能蘇海嶠氣早挾風霜物望隆鐘鼎天家有棟樑  
關心平罔象矢志掃欃槍撫恤千家頌勤勞五夜香滄溟歸吐  
納白日照忠良勲業原霄漢文名更斗筐八瀛開地紀五色挾  
天章獨步無寥濶高吟接混茫有雲爭上下與月共迴翔多士  
趨淵府崇情惜衆芳瑤環羅掌握玉樹列門牆競咏裴公柳羣  
歌召伯棠不才甘下里殊賞荷中郎徑下陳蕃榻長懸屈子囊  
孤禽看去就一劍問行藏白屋名何用青山願未償諸君皆聳  
拔今我尙佯狂對酒思招月論詩怯望洋謬蒙鷺鳳製不棄野



螢光感歎奇才困矜憐客路長此心深激烈公意豈低昂飛轍  
誠難逐神淵未易航截將青玉屑天半獻瑤芳